

Program Asasi Sains Diperkenal Di UMS

Oleh Nor Hamizah Hazirah B. Hussien

Sejumlah 52 pelajar lepasan Sijil Pelajaran Malaysia dan Sijil Penilaian Menengah Vokasional (SPMV), kebanyakannya merupakan pelajar dari bahagian pedalaman, berjaya mendapat tempat untuk menyambung pengajian mereka di Universiti Malaysia Sabah (UMS) dalam Program Asasi Sains, yang dilancarkan pada 26 April yang lalu.

Naib Canselor UMS, Brig. Jen. Prof. Datuk Seri Panglima Dr. Kamaruzaman Hj. Ampon berkata, program asasi sains yang diperkenalkan ini akan memberi asas yang kuat kepada pelajar sebelum mereka menyambung pengajian dalam program Ijazah Sarjana Muda di UMS.

"Saya pasti para ibu bapa dan pelajar lepasan SPM dan SPMV amat menanti-nantikan peluang ini. Pengenalan kepada program ini sebenarnya adalah sebahagian daripada usaha UMS untuk memenuhi aspirasi kerajaan dalam melahirkan lebih banyak pakar dalam bidang sains dan teknologi pada masa akan datang," katanya.

Katanya lagi, selain program asasi sains, UMS juga akan fokus dalam mengenengahkan program asasi dalam bidang yang berlainan termasuk ekonomi, pengurusan sains dan sains sukan.

Menurut Prof. Dr. Mohd. Harun Abdullah, Dekan Sekolah Sains dan Teknologi UMS, program ini akan memberi asas pengetahuan yang kuat terhadap bidang sains dan teknologi. 52 pelajar perintis yang terpilih adalah di kalangan pelajar terbaik yang berasal dari sekitar pedalaman, seperti Lahad Datu, Tawau, Semporna, Keningau, dan Tambunan.

